

## ՔՅՈԹՈՒ ԽԱՆ.

### ՍԵՔԱՍՏԻԱՅԻ ՏԵՂԱՀԱՆՈՒԹՅԱՆ ՃԱՆԱՊԱՐԿԻ ՄԻ ԿԱՅԱՆԻ ՇՈՒՐՁ

*Ռորենրտ Սուքիասյան*

Հոդվածում ներկայացվում են 1915 թ. Սեբաստիա նահանգի տեղահանության ճանապարհին տեղակայված կայաններից մեկում՝ Քյոթու խանում, տեղի ունեցած իրադարձությունները, մասնավորապես կոտորածն ու թալանը: Ուսումնասիրությունը կատարվել է հայկական արխիվներում, տպագիր մամուլում, առանձին գրքերում, հավաքածուներում տեղ գտած ակնատես-վերապրողների վկայությունների, երիտթուրքական դատավարությունների համատեքստում ի հայտ եկած փաստաթղթերի, ինչպես նաև թեմային նվիրված ուսումնասիրությունների համեմատական քննության հիման վրա: Հոդվածում քննարկվող նյութը ցույց է տալիս, որ «Ապահովագրական հանձնաժողով» անվանումը կրող խմբի կողմից կայանում իրականացված բռնությունները, կոտորածն ու թալանն իշխանությունների կողմից նախապես ծրագրված, համակարգված և իրենց բնույթով ոչ եզակի դեպքեր էին: Հատուկ ուշադրություն է դարձվել կայանի դեպքերին առնչություն ունեցած օտար ականատեսի, զոհ և ոճրագործ խմբերի միջև եղած կապերին ու դրանց փոխազդեցություններին:

*Բանալի բառեր.* Հայոց ցեղասպանություն, Սեբաստիա, Քյոթու խան, տեղահանություն, կոտորած, թալան, Ապահովագրական հանձնաժողով, գավառ, վեց վիլայեթներ, օտար ականատես:

\*\*\*

Հայոց ցեղասպանության իրականացման էական մաս են կազմել բռնի տեղահանությունները: Տեղահանության ճանապարհին կանխամտածված և հատուկ մտադրությամբ բռնի տեղահանված հայերի խմբերը ենթարկվել են տարատեսակ բռնությունների, այդ թվում՝ կոտորածների և թալանի: Տարագրությունն ընդհանրապես իրականացվում էր հետիոտն կամ շոգեկառքերով: Այս նպատակին էին ծառայում ճանապարհին հիմնված անցումային կայանները, որտեղ տարագրված խմբերը ժամանակավորապես պահվում էին, ապա շարունակում իրենց ճանապարհը դեպի սիրիական անապատ: Կայանները սովորաբար տեղակայված էին մեծ բնակավայրերից հեռու՝ դաշտային կամ լեռնային վայրերում: Այսպիսի կայան էր նաև Քյոթու խանը<sup>1</sup> տեղակայված Սեբաստիայի և Խարբերդի վիլայեթների սահմանագլխին: Քյոթու խանը հանգուցային էր Սեբաստիայի տեղահանությունների երկու հիմնական ճանապարհների համար: Առաջինը սկսվում էր Սեբաստիա քաղաքով և շարունակվում դեպի Թեջիր խան, Մաղարա, Կանգալ, Ալաջա խան, Քյոթու խան՝ շարունակվելով դեպի Հասան Չելեբի, Հեթիմ խան, Հասան Պատրիկ և ձգվելով դեպի հարավ: Սա եղել է Սեբաստիա քաղաքի և շրջակա բնակավայրերի բնակչության տեղահանման հիմնական ճանապարհը: Երկրորդ ճանապարհի հիմնական կետերն անցել են Սամսոն, Մարզվան, Ամասիա, Եվդոկիա, Շարգըշլա՝ հասնելով մինչև Կանգալ և Քյոթու խան,

1 Խան – իջևանատուն:

որտեղից արդեն տարհանման երկու ճանապարհները միավորվել են և շարունակվել դեպի հարավ: Բոլոր վերոնշյալ կայաններն այս կամ այն կերպով նույնպես եղել են թալանի և կոտորածի կենտրոններ:

Ստորև վերլուծվել են Քյոթու խան կայանի գործունեությունն ապահովող խմբի կազմը, այնտեղ տեղ գտած թալանի և կոտորածների տրամաբանությունը՝ դրանց հաջորդականությունը, հիմնական մեթոդները և նպատակները: Իրողությունների վերաբերյալ առավել ընդհանրական պատկերացում կազմելու համար գուգահեռներ են անցկացվել նմանատիպ իրադարձությունների միջև հայկական և օտար աղբյուրների համադրությամբ ներկայացվել է օտար ականատեսի ազդեցությունն ու գործոնը ցեղասպանական գործողությունների վրա:

### Աղբյուրներ

Տեղահանության իրադարձությունների հիմնական ականատեսը վերապրողն է, նա միակ սուբյեկտն է, որը կարող է մանրամասնորեն վկայել գործընթացում սկզբից մինչև ավարտը տեղ գտած իրադարձությունների մասին, քանի որ միայն նա է, որ անցել է տեղահանության ողջ ճանապարհը: Անմիջական ոճրագործները գործընթացի միայն հատվածական իրագործողներն ու ականատեսներն են: Ոչ անմիջական ոճրագործները՝ ընդհանուր գործընթացի կազմակերպիչները, գիտեն միայն իրենց կողմից արձակված հրամանների, դրանցով պայմանավորված հանցանքների տրամաբանությունն ու ակնկալվող արդյունքները: Այսպիսով, կայանում տեղ գտած իրադարձությունները բացահայտող բացառիկ աղբյուրներ են վերապրողների հուշերը, որոնք ստեղծվել են բուն գործընթացներին զուգահեռ և անմիջապես դրանց ավարտից հետո կամ հետագայում: Աշխատանքը լայնորեն հիմնվում է հայկական սկզբնաղբյուրների վրա: Հիմնարար նշանակություն ունեն Նուրարյան գրադարանի Սեբաստիա թղթածրարում պահվող փաստաթղթերը<sup>2</sup>, Հայաստանի ազգային արխիվի (ՀԱԱ) Համասեբաստահայերի վերաշինաց միության<sup>3</sup> և Գևորգ Մեսրոպի անձնական ֆոնդի<sup>4</sup>, Հայոց ցեղասպանության թանգարան-ինստիտուտում պահվող հուշագրությունները<sup>5</sup>: Որպես աղբյուր օգտագործվում են նաև Սեբաստիայի տարբեր

2 [http://www.bnulibrary.org/images/archives/fonds\\_andonian\\_new\\_pdf/Andonian49\\_Sebastia.pdf](http://www.bnulibrary.org/images/archives/fonds_andonian_new_pdf/Andonian49_Sebastia.pdf), BNU/Fonds A. Andonian, - *Matériaux pour l'histoire du génocide, Dossier 49 Massacres et déportations à Sébaste*, «Ամբասպանագիր-դեղնկագիր Սեբաստիոյ կուսակալութեան», էջ 0177-0190 հրատարակված (աշխատասիրությանը Վ. Լ. (Վարդան Լեոն), *Հայկազեան հայագիտական հանդես* (Պէրոթ), համար ԺԵ, 1995, էջ 499-519): Գարիկեան Կարապետ, *Տեղեկագիր Սեբաստիոյ և շրջակայից հայոց տարագրութեան և քննաշնչումի*, էջ 0051-0112, 0022-0049, *Սվլազ-Շար-Գըշլա*, էջ 0127-0128, Զառացյան Հայկանույշ, *Սրվազ*, էջ 0113-0116:

3 Օհաննէս Ալեքսանդրեանի հուշերը 1915 թ. եղեռնի մասին (ձեռագիր), ՀԱԱ ֆ. 439, ց. 3, գ. 115:

4 Հայկազուն, *Սեբաստիայի եղեռնագործությունը 1915-ի շարդերու արդեն* (ձեռագիր), ՀԱԱ ֆ. 1388, ց. 1, գ. 77:

5 Լուսարարյան Սեպուհ, *Մի կյանքի պատմություն*, պատճեն, ՀՅԹԻ, Ձեռագիր հուշագրությունների բաժին, գ. 127, գ.128, գ.129:

քնակավայրերի շուրջ ստեղծված հուշամատյանի ժանրի գրքերից<sup>6</sup>, առանձին հուշերի հավաքածուներից<sup>7</sup> և գիտական հանդեսներից<sup>8</sup> քաղված նյութեր: Գրքային աղբյուրներից, անշուշտ, կենտրոնականը Կարապետ Գաբրիլյանի «Եղեռնապատում» է, հեղինակը ոչ միայն հայտնում է իր տեսածների մասին, այլև ամփոփ ներկայացնում է ուրիշ վերապրողների պատմածները և վերլուծում Սեբաստիայի կոտորածների ցեղասպանական ողջ ընթացքը: Գրքային ձևաչափով իրադարձությունների մանրամասն նկարագրություն կարելի է գտնել Փայլածու Ա. Գաբտանյանի «Ցաւակը»<sup>9</sup> հատորի մեջ: Հետազոտական են նաև սիյուռքյան տպագիր մամուլում՝ «Արև»<sup>10</sup> (Ալեքսանդրիա), «Երիտասարդ Հայաստան»<sup>11</sup> (Զիկագո), «Հայրենիք»<sup>12</sup> (Բոստոն) տեղ գտած նյութերը: Ուսումնասիրության պատկերն ամբողջացրել ենք երիտթուրքական դատավարությունների համատեքստում ի հայտ եկած նյութերով, որոնք կարելի է գտնել հայր Գրիգոր Կերկերյանի արխիվում (թվայնացված տարբերակով<sup>13</sup>): Armenian Film Foundation-ի հավաքածուից ուշագրավ տեղեկություններ է հաղորդում միսիոներուհի Մերի Գրեֆեմի զարմիկն իր տեսածայնագրված վկայության մեջ<sup>14</sup>: Հետազոտության համար օգտագործվել են վերապրողների հուշերի վրա հիմնվող ուսումնասիրությունները, ինչպիսիք են Սեպուհ Ակունիի «Միլիոն մը հայերու ջարդի ամբողջական պատմութիւնը (1914-1918)»<sup>15</sup> և Ռայմոնդ Գևորգյանի «Հայոց ցեղասպանություն. ամբողջական պատմություն»<sup>16</sup> աշխատությունները:

6 Համբարձումյան Վահան, *Գիւղաշխարհ. Պարունական, ազգագրական ուսումնասիրութիւն*, Փարիզ, տպարան «Տարօն», 1927: Գաբրիել Սիմոնեան, *Յուշամատենան պոնտական Ամասիոյ, Վենետիկ, ա.հ.*, 1966: Զարդարեան Երուանդ, *Պարունագիրք Տիվրիկ քաղաքի*, Պէյրութ, Համազգայինի «Վահէ Մէթեան» տպարան, 1972:

7 ՀՃՈՒ հիմնադրամի գիտական ուսումնասիրություններ, հատոր 14, *Հուշագրական ժառանգություն*, Երևան, «Հայկական ճարտարապետությունն ուսումնասիրող հիմնադրամ», 2011:

8 Քօսեան Յակոբ, «Գանտիտա Գոյումճեան. Աքսորի ճամբան (1915)», աշխատասիրութեամբ Հ. Պօղոս Վրդ. Գոճանեանի, Մերուժան Կարապետեանի, *Հանդէս անւօրեայ* (Վիեննա-Երեւան), 2015, թիւ 1-12, էջ 345-483:

9 Գաբտանեան Փայլածու, *Ցաւակ*, Նիւ Եօրք, «Արմենիա» տպարան, 1922:

10 Կարապետեան Էլիզա, «Զուլումի երկրէն: Սեբաստացի աղջկան մը նամակը», «Արեւ» թերթ (Ալեքսանդրիա), 1917, թիւ 94 (404) - թիւ 97 (407):

11 Գաբրիլեան Կարապետ, *Եղեռնապատում Փոքուն Հայոց Եւ Նորին Մեծի Մայրաքաղաքին Սեբաստիոյ (Գոժկան Սեբաստիոյ)*, «Երիտասարդ Հայաստան» թերթ (Զիքակո), սկսված 1919, թիւ 54, նոյեմբեր 8, մինչև 1921, թիւ 48, օգոստոս 22:

12 Շահէն Տէրտէրեան, «Արիւնի ճամբէս. Դէպի Գողգոթան», «Հայրենիք» ամսագիր (Պոսթըն), սկսված՝ 1950 թիւ 11 (298) մինչև 1953 թիւ 1 (323):

13 <http://commons.clarku.edu/guerguerian-archive/>:

14 George Partridge, <http://vhaonline.usc.edu/viewingPage?testimonyID=56557&returnIndex=0#>:

15 Ակունի Սեպուհ, *Միլիոն մը հայերու ջարդի ամբողջական պատմութիւնը (1914-1918)*, Կ.Պոլիս, «Հայաստան» գրատան հրատ., 1921:

16 Kévorkian Raymond, *The Armenian Genocide. A Complete history*. London, New York, I.B. TAURIS, 2011:

## Ապահովագրական հանձնախումբը

Սեբաստիայի առաջին քարավանի մեկնման օրը՝ հունիսի 22-ի առավոտյան, Քյոթու խան է ուղարկվում չեթենների<sup>17</sup> մի խումբ, որը կրում էր «Էմնիթ զոմխիոնիէ»<sup>18</sup> անվանումը<sup>19</sup>: Հանձնախումբը ղեկավարում էր Էմիր բեկի տղան՝ չեթեբաշի<sup>20</sup> Համիդ բեկը, որը Սեբաստիա վիլայեթի կուսակալ Մուամմերի յավերն<sup>21</sup> էր, հանձնախմբի անդամ էին նաև «արունկզակ դասակարգեն խումբ մը չեթաներ»՝ Խալիս բեկը, Բաջանաղ զադե Էդիեմ բեկը, Թյությունջի հաջի Խալիլը, Քյությունկի տղա Հյուսեյնը և այլք<sup>22</sup>:

Հայերի կասկածները փարատելու նպատակով Մուամմերը հանձնախմբի ուղարկվելը ներկայացնում է իբրև իր և Էմիր բեկի միջև հայերին տարագրելու խնդրին առնչվող տարաձայնություն, ինչի արդյունքում Էմիր բեկն իր տղային՝ Համիդին, մի խումբ չերքեզների գլուխ անցած, ուղարկում է հայերին տարագրության ճանապարհից հետ դարձնելու, որին ժողովուրդը հավատում է<sup>23</sup>: Արդեն տեղում հանձնախմբի գործունեությունը ներկայացվում էր որպես կառավարության կողմից տեղահանվող հայերի անվտանգությունն ապահովող նախաձեռնություն<sup>24</sup>: Նշվում էր՝ իբրև կառավարության կողմից ձեռնարկված միջոցներն անբավարար էին՝ ապահովելու խմբերի անվտանգ տեղահանությունը և քրդերի կողմից թալանի և խոշտանգումների կանխարգելումը<sup>25</sup>: Ուստի նշված խնդրի լուծումն ապահովելու համար կառավարությունն ուղարկել էր այդ հանձնախումբը<sup>26</sup>:

Համառոտակի ներկայացնենք խմբի անդամների կենսագրությունները և նախկինում ունեցած առնչությունները հայկական կոտորածներին:

Յոթյուկջյուլի Իբրահիմ կամ Իբր<sup>27</sup>՝ հանձնախմբի նախագահ<sup>28</sup>:

Էմիր բեկի տղա Համիդ չեթեապետն ուներ հայկական, թուրքական և չերքեզական արմատներ<sup>29</sup>: Եղել է Էրզրումի վիլայեթի Երզնկա գավառակի Կամարիկ

17 Չեթե – հրոսակ:

18 Էմնիթ զոմխիոնիէ – անվտանգության հանձնախումբ:

19 Գաբիկեան Կարապետ, *Եղեռնապատում, մաս Դ, 24*, «Երիտասարդ Հայաստան», 1920, 6 մարտ, թիւ 88:

20 Չեթե բաշի – հրոսակապետ:

21 Յավեր – թիկնապահ: Մուամմերը Սեբաստիայի նահանգապետն էր:

22 Գաբիկեան Կարապետ, *Եղեռնապատում, մաս Դ, 24*, «Երիտասարդ Հայաստան», 1920, 6 մարտ, թիւ 88:

23 Նույն տեղում:

24 Ակունի Սեպուհ, *նշվ. աշխ.*, էջ 94:

25 Տերտրեան Շահէն, *նշվ. աշխ.*, «Հայրենիք», 1951, թիւ 4 (303), էջ 64:

26 Գաբիկեան Կարապետ, *Եղեռնապատում. Փոքուն հայոց և նորին մեծի մայրաքաղաքին Սեբաստիոյ, Պոսթըն*, «Հայրենիք», 1924, էջ 140:

27 Նույն տեղում, էջ 142: Ակունի Սեպուհ, *նշվ. աշխ.*, էջ 94:

28 Գաբիկեան Կարապետ, *Եղեռնապատում*, 1924, էջ 140:

29 Նույն տեղում, էջ 142: Ակունի Սեպուհ, *նշվ. աշխ.*, էջ 94:

գյուղի գյուղապետ<sup>30</sup>, Սերաստիայի վիլայեթի կուսակալի թիկնապահ և մասնակցել է Սահակ վարդապետ Օդաբաշյանի քաղաքական սպանությանը<sup>31</sup>: Ըստ 1915 թ. տվյալների՝ դեռևս գտնվել է Սերաստիայում կամ Ուզուն Յայլայում՝ չերքեզների մոտ<sup>32</sup>:

Ըմին քեչյա-գաղե Խալիս բեկը՝ եկած Կովկասից, չեթե<sup>33</sup>, «չեթե ռեխի»<sup>34</sup> «Թեշքիլաթ Մահսուեի» մյուդիր, Իթթիհադի «րեխ»<sup>35</sup>, ցեղասպանությունից հետո գտնվել է Սերաստիայում: Հանցակից է 1914 թվականի դեկտեմբերի 18/31-ին Սահակ վարդապետ Օդաբաշյանի և նրա կառապան՝ գառացի Առաքել Կորիճյանի սպանություններին<sup>36</sup>: Թոնուս-Շար-Գըշլայի ճանապարհով անցնող Սամսոնի, Ամասիայի, Մարզվանի, Թոքատի քարավանների կողոպտիչ, տղամարդկանց ջարդարար, աղջիկ-հարսների գանգվածային վաճառող<sup>37</sup>:

Բաջանաղ գաղե Էդիեմ բեկը (չեթե)՝ Իբնե (իգացյալ-պոռոկացյալ<sup>38</sup>) մականունով, եղել է Սերաստիա քաղաքի քաղաքապետարանի պաշտոնյա, ջարդերի կազմակերպիչ, Բաջանաղ գաղե Համդիի եղբորորդին էր<sup>39</sup>:

Թյությունջի հաջի Խալիլ (չեթե)<sup>40</sup>, հանձնախմբում կատարել է գրագրի պաշտոն<sup>41</sup>:

Քյուրուկ-Մեհմեդի որդի Հյուսեյնը (չեթե)<sup>42</sup> սերտ հարաբերություններ է ունեցել հայերի հետ, տիրապետել է հայոց լեզվին<sup>43</sup>: Մուսամները Հյուսեյնի հոր 200 ոսկի պարոքի դիմաց առաջարկել է դառնալ չեթե<sup>44</sup>: Ուներ քաղաքական հակումներ, սուլթան Աբդուլ Համիդին պախարակողներից էր, իթթիհադական<sup>45</sup>: Եղել է Սահակ վարդապետ Օդաբաշյանի սպանության<sup>46</sup> մասնակիցներից, վարդապետի սպանու-

30 Guerguerian K., “Military 08” (2018). Military Tribunals / Muhtelif Konular. 8. <https://commons.clarku.edu/military/8>:

31 Հայկազուն, նշվ. աշխ., էջ 10-11:

32 Նույն տեղում:

33 Ակունի Սեպուհ, նշվ. աշխ., էջ 94:

34 Րեխի – պետ:

35 Գաբրիկեան Կարապետ, *Եղեռնապատում*, 1924, էջ 592:

36 Հայկազուն, նշվ. աշխ., էջ 10-11:

37 Գաբրիկեան Կարապետ, *Եղեռնապատում*, 1924, էջ 142:

38 Գաբրիկեան Կարապետ, *Եղեռնապատում*, մաս Դ, 31, «Երիտասարդ Հայաստան», 1920, մարտ 31, թիվ 95: Ակունի Սեպուհ, նշվ. աշխ., էջ 94:

39 Հայկազուն, նշվ. աշխ., էջ 2:

40 Գաբրիկեան Կարապետ, *Եղեռնապատում*, 1924, էջ 142: Ակունի Սեպուհ, նշվ. աշխ., էջ 94:

41 Գաբրիկեան Կարապետ, *Եղեռնապատում*, 1924, էջ 142:

42 Հայկազուն, նշվ. աշխ., էջ 11: Ակունի Սեպուհ, նշվ. աշխ., էջ 94:

43 Գաբրիկեան Կարապետ, *Եղեռնապատում*, 1924, էջ 160:

44 Նույն տեղում:

45 Նույն տեղում:

46 Նույն տեղում, էջ 160:

թյունից հետո՝ Ալիսի հովտի գյուղերի ջարդարար<sup>47</sup>, թուրք զինվորների թունավորման սադրանքի<sup>48</sup> հեղինակներից: Քյոթու խանի գործողություններից կարճ ժամանակ անց ազատվել է բանտից: 1919-ի ամռանը հայտարարվել է սպանված<sup>49</sup>:

Ահմեդ Չավուշ<sup>50</sup> հանձնախմբի անդամ:

Սահակ վարդապետ Օդաբաշյանը համաձայնություն էր հայտնել առաջնորդելու Երզնկայի թեմը և Պոլսոս պատրիարքարանի կողմից նշանակվել էր այնտեղ ծառայության<sup>51</sup>: Աղվանիս գյուղի շրջակայքում Սեբաստիայի կուսակալ Մուամմերի և կայսրության ներքին գործերի նախարար Թալեայթի գաղտնի հեռագրական նամակագրությամբ որոշում է կայացվել սպանել Սահակ վարդապետ Օդաբաշյանին՝ նրան կասկածելով հեղափոխական գործունեության մեջ<sup>52</sup>: Հետագայում նշանակված հետաքննությունից պարզ դարձավ, որ վարդապետի իրերից վերցվել էին միայն փաստաթղթերը, իսկ հարստությունները թողնվել էին տեղում, ինչը ևս մեկ անգամ հաստատում է սպանության քաղաքական բնույթը:

### Քարավանի դիմավորումը

Ինչպես նշվեց նախաբանում, Սեբաստիայի տարբեր բնակավայրերից տարագրված գրեթե բոլոր խմբերն իրենց ուղեկցող ժանդարմների կողմից ուղղորդվել են դեպի Քյոթու խան՝ Սեբաստիայի տեղահանության ճանապարհի հանգուցային կետերից մեկի միջով անցնելու: Կայսրության կողմից խմբերին տեղահանության ճանապարհին ուղեկցելու համար յուրաքանչյուր քարավանի կցվում էին ժանդարմներ: Քյոթու խանի հետ կապված թալանի և բռնությունների շարքը սկսվում էր նույնիսկ մինչև կայանին հասնելը. ժանդարմները սպառնում էին առջևում գտնվող սպանդարանով կամ 2-10 ոսկու<sup>53</sup> դիմաց առաջարկում պաշտպանություն: Քյոթու խանում, վերոնշյալ հանձնախմբից բացի, տեղակայված էին մեծ քանակությամբ չեթեներ՝ քրդեր՝ զինված բիրերով, կացիներով և դանակներով<sup>54</sup>, որոնք կապված էին *Թեշքիլաթ-ը մահսուսե*-ի հետ և ցեղասպանության իրականացման մեխանիզմի կարևոր մասն էին:

47 Նույն տեղում:

48 Նույն տեղում, էջ 592: Kévorkian Raymond, նշվ. աշխ., էջ 431-432:

49 Լուսարարյան Սեպուհ, նշվ. աշխ., էջ 162: Գաբրիելյան Կարապետ, *Եղեռնապատյում*, 1924, էջ 592:

50 Լուսարարյան Սեպուհ, նշվ. աշխ., էջ 159:

51 Գաբրիելյան Կարապետ, *Եղեռնապատյում*, 1924, էջ 45:

52 Սպանության մանրամասն պատմությունը հիմնված օսմանյան գաղտնի հեռագրերի վրա տե՛ս Գրիգոր Գերգելյանի անտիպ հոդվածում՝ Guerguerian, Krikor, “41 Courts Martial - Telegrams” (2018). *Adana Confiscation (Courts Martial)*. 38. [https://commons.clarku.edu/adana\\_court\\_martial/38](https://commons.clarku.edu/adana_court_martial/38):

53 Լուսարարյան Սեպուհ, նշվ. աշխ., էջ 159:

54 Սիմոնեան Գաբրիել, նշվ. աշխ., էջ 669:

Քյոթու խանի շրջակայք հասնելուն պես հանձնախմբից որևէ մեկը (Խալիս<sup>55</sup>, Համիդ<sup>56</sup>, Հյուսեյն<sup>57</sup>) կամ մի խումբ<sup>58</sup> դիմավորում էր մոտեցող քարավանը՝ ներկայացնելով հանձնախմբի գործառույթները: Հանձնախմբի մոտեցումները, ժամանակի և տարիանվողների կազմով պայմանավորված, փոփոխվում էին: Սկզբնական շրջանում, երբ տարագրվում էին Սեբաստիա քաղաքի հարուստ և մտավորական խավերը, փորձեր էին կատարվում՝ ներկայացնելու տարագրության քաղաքական հիմնավորումներ, ցուցաբերվում էր փոքրիշատե սիրալիք վերաբերմունք: Այսպես, առաջին քարավաններից մեկը դիմավորելիս Էմիր բեկի տղա Համիդը սիրալիք բարևել է իրեն ծանոթ հայերին և փորձել է ներկայացնել տեղահանության քաղաքական հիմնավորումները՝ ափսոսանք հայտնելով, որ հայերը «դավաճանել են Օսմանյան կայսրությանը», ու չնայած դրան՝ «բարեխնամ» կառավարությունը փորձել է ապահովել տեղահանվողների անվտանգությունը<sup>59</sup>:

Գույքի հանձնման հրահանգը տալուց հետո ճշտում էին, թե արդյոք տարագրյալները համաձայն են իրենց գույքերը տալ<sup>60</sup>: Հանձնումից հետո քարավանի ծանոթ հայերին մատուցվել է պատշաճ ճաշ<sup>61</sup>: Հաջորդող քարավանների հանդեպ վերաբերմունքը վատթարացել է: Ըստ մի վկայության՝ 20 քրդեր կրակով սպառնացել են քարավանի անդամներին և անուն-ազգանունները գրանցելուց հետո առանձնացրել են 10-11 տարեկան երեխաներին, այնուհետև 5 ոսկի փրկագին պահանջել յուրաքանչյուր տղայի համար՝ սպառնալով մայրերի աչքի առջև սպանել, իսկ զավակ չունեցողներին ուղակիորեն կողոպտել են<sup>62</sup>:

Քարավանը կայանին մոտենալիս տեղահանվածների կառքերը մի քանի շարքով շարել են իրար հետևից<sup>63</sup>, հաշվել և ցուցակագրել մարդկանց ու սայլերը<sup>64</sup>: Հանձնախումբը տարագրվածներին դիմավորել է զինված, փամփշտակալները ձգած, հարձակվել է սայլերի վրա՝ սարսափի մթնոլորտ տարածելով: Խանի դիմաց վառված է եղել խարույկ՝ նախորդ քարավաններից սպանվածների դիակների հոտը չեզոքացնելու համար<sup>65</sup>:

55 Գաբիկեան Կարապետ, *Եղեռնապատում*, 1924, էջ 149: *Հուշագրական ժառանգություն*, էջ 190:

56 Գաբիկեան Կարապետ, *Եղեռնապատում*, 1924, էջ 139-140: Ալեքսանդրեան Օհաննես, նշվ. աշխ., էջ 20 շրջ.: Լուսարարյան Սեպուհ, նշվ. աշխ., էջ 160:

57 Գաբիկեան Կարապետ, *Եղեռնապատում*, 1924, էջ 138:

58 Համբարձումյան Վահան, նշվ. աշխ., էջ 222:

59 Լուսարարյան Սեպուհ, նշվ. աշխ., էջ 160-161:

60 Նույն տեղում:

61 Նույն տեղում:

62 Կարապետեան Էլիզա, *Ջուրումի երկրէն: Սեբաստացի աղջկան մը նամակը*, «Արեւ» (Աղեքսանդրիա) 1917, Գ. տարի, թ. 94 (404), դեկտեմբեր 14, էջ 1-2:

63 *Հուշագրական ժառանգություն*, էջ 190:

64 Համբարձումյան Վահան, նշվ. աշխ., էջ 222: Լուսարարյան Սեպուհ, նշվ. աշխ., էջ 159:

65 Գաբիկեան Կարապետ, *Եղեռնապատում*, 1924, էջ 139:

### Գործառույթների ներկայացման հայտարարությունը

Սկզբնական շրջանում հանձնախմբի գործառույթների և դրանից ենթադրվող գործողությունների մասին հայտարարությունը հաղորդելու համար տղամարդիկ կանչվում էին ըստ սայլերի կայանման ժամանակ կազմված ցուցակի<sup>66</sup>: Տեղահանվածներին ունեցվածքից զրկելու զանազան տարբերակներ էին կիրառվում: Ըստ դրանցից մեկի՝ ուղեկցող ժանդարմները մտնում էին քարավանի մեջ, հավաքում տղամարդկանց և տանում հանձնախմբի մոտ<sup>67</sup>: Այլ դեպքում մունետիկը գոռալով հաղորդում էր, որ տասը տարեկանից բարձր բոլոր տղամարդիկ պետք է հավաքվեին խանի դիմաց՝ կարևոր հայտարարություն լսելու, այլապես սպառնում էին գնդակահարությամբ<sup>68</sup>: Ըստ որոշ վկայությունների՝ գլխավոր չեթեի հրամանով տղամարդկանց բանտարկում էին վրանի մոտ գտնվող ախոռում կամ խանի ուրիշ հատվածում՝ հանձնախմբի զինված անդամների հսկողությամբ՝ հայտարարության բովանդակությանը ծանոթանալու համար<sup>69</sup>: Կառավարության հրամանով Մալաթիայի ճանապարհին քրդական կողոպուտից խուսափելու համար նրանք պետք է առգրավեին քարավանի անդամների մոտ գտնվող գումարները, ոսկյա, արծաթյա զարդերը և այլ թանկարժեք առարկաներ<sup>70</sup>: Տղամարդկանց հանձնարարվում էր գնալ և թանկարժեք իրերը հանձնելու մասին հայտնել իրենց մայրերին, քույրերին, նաև այն ընտանիքներին, որոնցում տղամարդ չկար<sup>71</sup>: Հայտնի են իրերի վերադարձման խոստումների մի քանի տարբերակներ: Դրանցից մեկն այն էր, որ գրավված իրերը պետք է ցուցակագրվեին և Մալաթիա հասնելուն պես՝ վտանգն անցնելուց հետո<sup>72</sup>, նույնությամբ վերադարձվեին<sup>73</sup>: Ըստ մի վկայության՝ առգրավված իրերը առանձին թղթատարով պետք է ուղարկվեին Մալաթիա<sup>74</sup> կամ փոստով ուղարկվեին Սեբաստիայից<sup>75</sup>: Մեկ այլ վկայության համաձայն՝ Խալիս բեկը տղամարդկանց հավաքելուց հետո ներկայացնում է իր մոտ գտնվող մի ֆերման (հրամանագիր)՝ հայտնելով, որ գործողությունը կատարվել է սուլթանի հրամանով, և ումից ինչ չափով առգրավում կատարվել է, պետք է ամեն ամիս հավասարաչափ

66 Լուսարարյան Սեպուհ, նշվ. աշխ., էջ 162:

67 Համբարձումյան Վահան, նշվ. աշխ., էջ 222:

68 Ալեքսանդրեան Օհանես, նշվ. աշխ., էջ 20 շրջ:

69 BNU/Fonds A. Andonian - *Massacres et déportations à Sébaste, Սվազ-Շար-Գըշա*, էջ 0127: ՀԱԱ ֆ. 439, ց. 3, գ. 115, էջ 22 շրջ: Սիմոնեան Գ., նշվ. աշխ., էջ 669:

70 Սիմոնեան Գաբրիել, նշվ. աշխ., էջ 669:

71 Գաբրիելեան Կարապետ, *Եղեռնասպալում*, էջ 140: BNU/Fonds A. Andonian, *Massacres et déportations à Sébaste*, Ջառացյան Հայկանույշ, *Սվազ*, էջ 0114 շրջ.:

72 Տերտրեան Շահէն, նշվ. աշխ., «Հայրենիք» ամսագիր, 1951, թիւ 4 (303), ապրիլ, 1951, էջ 64:

73 Ջառացյան Հայկանույշ, *Նույն տեղում*, էջ 0114: Լ. Վ., նշվ. աշխ., էջ 502: Լուսարարյան Սեպուհ, նշվ. աշխ., էջ 161: Ակունի Սեպուհ, նշվ. աշխ., էջ 94:

74 Գաբտանեան Փայլածու, նշվ. աշխ., էջ 61:

75 Ալեքսանդրեան Օհանես, նշվ. աշխ.:



հետ բաշխվի<sup>76</sup>: Հայտնի է փողերի վերադարձի մեկ այլ տարբերակ ևս, ըստ որի՝ առգրավված գումարը պետք է վերադարձվեր սննդի տեսքով<sup>77</sup>, կամ առգրավված գումարը կվերադարձնեին, երբ քարավանը վերադառնար<sup>78</sup>: Մինևույն ժամանակ սպառնում էին, որ եթե հանձնումից հետո խուզարկության արդյունքում հայտնաբերվեր հարստություն, այն թաքցնողները կսպանվեին<sup>79</sup>: Իսկ քարավանի այն անդամներին, որոնց մոտ ունեցվածք չէր հայտնաբերվում, մինևույն է, սպասվում էր նույն ճակատագիրը<sup>80</sup>: Բոլոր աղբյուրները հայտնում են, որ նրանք այդչափ միամիտ չէին և չէին վստահում հարստությունների վերադարձման խոստմանը, սակայն այնչափ բարոյալքված էին, որ ուրիշ ելք չկար<sup>81</sup>: Քարավաններին գույքը հանձնելու համար գործադրվում էր նաև վախի և շանտաժի սխեմա՝ ընդհուպ մինչև բեմականացում: Քարավաններից մեկին (որի մեջ էր Կարապետ Գաբրիկյանը) գույքի հանձնման լուրը հայտնելուց անմիջապես հետո խանի հետևից դուրս է գալիս մի ժանդարմ՝ տեղեկացնելով, որ առավոտ խանից դուրս բերված սամսոնցիների քարավանի վրա քրդերի կողմից կատարվել է հարձակում, տեղի են ունեցել թալան և սպանություններ<sup>82</sup>, ինչից հետո հանձնախմբի անդամ Համիդն իրեն շրջապատող չեթեններին հրամայել է խմբին պաշտպանելու համար արագ ձիավորներ հասցնել քարավանի մոտ<sup>83</sup>: Այս բեմադրությունը նախատեսված էր տարագրյալներին խրախուսելու համար՝ ավելի մեծ ծավալներով հանձնելու գույքը: Իթթիհադի ներկայացուցիչները, այնուամենայնիվ, պետք է պահպանեին պետական ծառայողների որոշակի պահելաձև, ինչով և բացատրվում են կայանում տեղ գտած ձևական գործողությունները<sup>84</sup>: Հրահանգը հայտնելուց հետո ժամանակ էր տրվում գույքը բերելու և հանձնելու խանի դիմաց տեղակայված տաղավարների վրա: Ոմանք վախենալով ամբողջ ունեցածը հանձնում էին, ոմանք էլ՝ կեսը կամ քառորդը պահում<sup>85</sup>: Կանայք և աղջիկները կուլ էին տալիս ոսկիները, թաքցնում իրենց կամ մանուկների մոտ, հողի ու կառքերի տակ<sup>86</sup> կամ խանի շրջակայքում<sup>87</sup>: Տեսնելով հանձնվող հարստությունների ծավալները՝ քարավաններին ուղեկցող ժանդարմները, որոնք «անվճար» էին կատարում իրենց ծառայությունը, զայրանում էին և նույնպես մասնակցում

76 Հուշագրական ժառանգություն, էջ 190:

77 Նույն տեղում, էջ 212:

78 Համբարձումյան Վահան, նշվ. աշխ., էջ 222:

79 Զառացյան Հայկանույշ, նշվ. աշխ., էջ 0114: Հուշագրական ժառանգություն, էջ 191: Համբարձումյան Վահան, նշվ. աշխ., էջ 222: Լուսարարյան Սեպուհ, նշվ. աշխ., էջ 162:

80 Զառացյան Հայկանույշ, նշվ. աշխ., էջ 0114:

81 Գաբտանեսան Փայլածու, նշվ. աշխ., էջ 61: Ալեքսանդրեան Օհաննես, նշվ. աշխ., էջ 20 շրջ.:

82 Գաբրիկեան Կարապետ, *Եղևոնսպարում*, էջ 140-141:

83 Նույն տեղում:

84 Kévorkian Raymond, նշվ. աշխ., էջ 439-440:

85 Հուշագրական ժառանգություն, էջ 190:

86 Նույն տեղում:

87 Լուսարարյան Սեպուհ, նշվ. աշխ., էջ 164:

թալանին<sup>88</sup>: Հայտնի է դեպք, երբ ժանդարմների մատուցած «ծառայությունների» համար առաջարկվել է, որ ամեն մարդ վճարի երկու ոսկի<sup>89</sup>:

Իսանի դիմաց բացվել են երկու տաղավարներ, որոնց շուրջ հանձնախումբը, բաժանվելով երկու մասի, սկսել է գանձերի ընդունումը: Քարավանների կարևոր անձանցից մի քանիսը ներգրավվել են հանձնախմբի մեջ<sup>90</sup>: Հանձնախմբի անդամները զինված էին հրացաններով, խարազաններով, կրծքերին կախված էին դատարկ փամփուշտներ<sup>91</sup>: Հանձնման ժամանակ հանձնախումբն անուն-ազգանուններով<sup>92</sup> դասակարգված<sup>93</sup> գրանցել է ստացած թանկարժեք իրերը<sup>94</sup>: Հանձնախմբի անդամները, լինելով Սեբաստիայի հայտնի հանցագործներ և առնչություն ունենալով հայերի հետ, քաջատեղյակ էին հայերի կարողություններին: Այն դեպքերում, երբ հանձնվող ավարն ակնկալվածից ավելի քիչ էր լինում, կատարվում էին բռնություններ, ինչից հետո քարավանի անդամների մոտ եղած մնացած ունեցվածքը բռնագրավվում էր<sup>95</sup>: Ռ. Գևորգյանի դիպուկ բնորոշմամբ տեղահանվածներից՝ «հանուն իրենց ապահովության» կարողություն առգրավող «փրկիչները» նրանց զրկում էին գոյատևման միջոցներից<sup>96</sup>: Կատարվում էին ցուցադրական ահաբեկումներ՝ ևս մեկ անգամ խրախուսելու հարստությունների ամբողջական հանձնումը: Տարագրյալները, բռնություններից վախենալով, նույնիսկ ուրիշներից էին փող վերցնում և հանձնում<sup>97</sup>: Հանձնախմբի անդամներին ծանոթ մարդկանց տրվում էր մեկ ժամ ժամանակ՝ հանձնումը լրացնելու համար<sup>98</sup>: Իրերի հանձնման գործընթացի ավարտից հետո կատարվում էին բանտարկություններ, և շարունակվում էին բռնությունները<sup>100</sup>: Բանտարկությունից ոսկի տալու խոստմամբ ազատված մի տղայի՝ ոսկին չտալու պատճառով ենթարկել են սաստիկ ծեծի, տեսարանի ականատեսները հավաքել և հանձնել են գումարը, սակայն չեն կարողացել փրկել նրա կյանքը. նա մի քանի

88 Նույն տեղում:

89 Տերտերեան Շահէն, նշվ. աշխ., 1951, թիւ 4 (303) ապրիլ:

90 Նույն տեղում: Ալեքսանդրեան Օհաննես, նշվ. աշխ., էջ 20 շրջ.-21:

91 Գաբրիկեան Կարապետ, *Եղեռնապատում, մաս Ե, 32*, «Երիտասարդ Հայաստան», 1920, թիւ 96, ապրիլ 3: Գաբրիկեան Կարապետ, *Տեղեկագիր Սեբաստիոյ և շրջակայից հայոց տարագրութեան եւ բնասջնջումի*, էջ 106:

92 Գաբրիկեան Կարապետ, *Եղեռնապատում*, 1924, էջ 143: Գաբրիկեան Կարապետ, *Տեղեկագիր Սեբաստիոյ*, էջ 106:

93 *Հուշագրական ժառանգություն*, էջ 212:

94 Գաբրիկեան Կարապետ, *Տեղեկագիր Սեբաստիոյ*, էջ 106:

95 *Հուշագրական ժառանգություն*, էջ 191:

96 Գաբրիկեան Կարապետ, *Եղեռնապատում*, 1924, էջ 143-146: *Հուշագրական ժառանգություն*, էջ 212:

97 Kévorkian Raymond, նշվ. աշխ., էջ 439:

98 *Հուշագրական ժառանգություն*, էջ 191:

99 Լուսարարյան Սեպուհ, նշվ. աշխ., էջ 162:

100 *Հուշագրական ժառանգություն*, էջ 191:

ժամ անց մահացել է<sup>101</sup>: Հայտնի է դեպք, երբ ախոռում բանտարկված տղամարդկանց հարդի կրակի ծխով սպանել են<sup>102</sup>: Կայանը դարձել էր սպանդարան աչքի ընկնող տղամարդկանց, երիտասարդների և մտավորականների համար<sup>103</sup>: Առանձին անհատներ ցուցակով կանչվել և ուղարկվել են սպանդի<sup>104</sup>: Այստեղ են իրենց մահկանացուն կնքել Սեբաստիայի ավագ սերնդի մտավորականներից 70-ամյա Աստուրյան Հարությունը, Պասկյալ էֆենդին, ով երկար տարիներ աշխատել է որպես հեռագրատան պաշտոնյա և Կյուրինի կայմակամի փոխանորդ: Կայանում Քյոթուկի տղայի ցուցումով ամեն քարավանից 40-50-ական մարդ է սպանվել<sup>105</sup>: Եղել են նաև բացառություններ, ինչպես օրինակ՝ Կարապետ Գաբրիլյանի քարավանը, որը փրկվել է Հյուսեյնի հետ ունեցած խնամփական կապի շնորհիվ<sup>106</sup>: Սպանություններից խուսափել է նաև Օհաննես Ալեքսանդրյանի քարավանը<sup>107</sup>: Սեբաստիայի յոթերորդ քարավանի զինվորագրության տարիքի տղամարդկանց հավաքել են և նույն զիջերը բոլորին սպանել<sup>108</sup>: Ըստ Հայկանույշ Զառացյանի հաղորդած տվյալների՝ իր քարավանի երիտասարդներին բանտարկել են, իսկ ծերերին՝ բաց թողել<sup>109</sup>: «Գիղաշխարհ»-ում տպագրված անունն անհայտ մի կնոջ վկայության համաձայն՝ Սեբաստիայից տեղահանված չորրորդ քարավանի աչքի առջև սպանել են տարագրված տղամարդկանց մի մասին<sup>110</sup>: Ըստ Նուբարյան մատենադարանի Սեբաստիայի թղթածրարի մեջ գետեղված «Սվազ-Շար-գըշլա» վերնագիրը կրող փաստաթղթի՝ նույնիսկ փրկագին վճարելուց հետո բոլորին բաց չեն թողել, և փրկվել են միայն կանանց հագուստով ծպտված տղամարդիկ<sup>111</sup>:

Հատուկ թիրախավորման խմբեր էին առևտրականները, արհեստավորները, պետական աշխատողները, կուսակցականները, հոգևորականները և նրանց ընտանիքները: Այս խմբերից պահանջվում էր առավել մեծ քանակի հարստություն: Օրինակ՝ կոշկակար Կեզուրենց Գրիգոր վարպետից պահանջել են 300 ոսկի, հայտնի մսագործ Ղասապ-Ռոզիկ Էմինի կնոջը՝ Անթառամին, ենթարկել են խոշտանգումների և միայն հանձնախմբի հայ անդամների միջնորդությամբ դադարեցրել են ծեծը և երկրորդ հնարավորություն տվել՝ հանձնելու թաքցրած հարստությունը<sup>112</sup>: Մի այլ վկայության համաձայն՝ հարուստ վաճառականի կնոջից պահանջել են մեծ քանակի

101 Տերտերեան Շահէն, նշվ. աշխ., «Հայրենիք», 1951, ապրիլ, թիւ 4 (303), էջ 65:

102 Գաբրիկեան Կարապետ, *Եղեռնապատում*, 1924, էջ 151:

103 Համբարձումյան Վահան, նշվ. աշխ., էջ 222: Լ.Վ., նշվ. աշխ., էջ 502:

104 Լուսարարյան Սեպուհ, նշվ. աշխ., էջ 164:

105 Գաբրիկեան Կարապետ, *Եղեռնապատում*, 1924, էջ 149:

106 Նույն տեղում, էջ 159:

107 Ալեքսանդրեան Օհաննես, նշվ. աշխ., էջ 21 շրջ.:

108 Գաբրիկեան Կարապետ, *Եղեռնապատում*, 1924, էջ 151:

109 Զառացյան Հայկանույշ, նույն տեղում, էջ 0114:

110 Համբարձումյան Վահան, նշվ. աշխ., էջ 222:

111 BNU/Fonds A. Andonian, *Massacres et deportations à Sébaste*, *Սվազ-Շար-գըշլա*, էջ 0127:

112 Գաբրիկեան Կարապետ, *Եղեռնապատում*, 1924, էջ 144-145:

հարստություն, երբ նրա կինն ասել է, թե ունի ընդամենը 10 ոսկի, որից 8-ն է պատրաստ տալ, ենթարկվել է խոշտանգումների. նրան կապել են ձիու պոչից և խարագանով բազմաթիվ հարվածներ հասցրել, ինչից հետո սկզբում զավակին են սպանել նրա աչքի առաջ, այնուհետև՝ նրան<sup>113</sup>: Մի հայտնի դրամափոխի էլ սպանել են իր երեխաների աչքի առջև<sup>114</sup>: Տարպապոնց խանի սենեկապետ Տերտերյան Նշանին գանակոծել և բանտարկել են: Հաճի Կարոն, ով դանակագործներին քար էր մատակարարում և տարիներով գումար էր հավաքել, ստիպված հանձնախմբին մի պարկ, այն է՝ 800 ոսկի է հանձնել<sup>115</sup>: Հարություն Աստուրյանից պահանջել են 500 ոսկի և այլ հարստություններ, նրան ծեծելով սպանել են՝ ասելով, թե 50 տարուց ավելի պետական պաշտոն ստանձնելով՝ թալանել է կայսրությունը<sup>116</sup>: Սուրբ Սարգիս եկեղեցու քահանաներ Տ. Իրավափառ և Տ. Եփրեմ քահանաներին ենթարկել են սուկալի գանակոծությունների, մերկացրել և ենթարկել են անարգանքների, պահանջել եկեղեցական գանձեր և երկուսին էլ տանջահար անելով՝ սպանել՝ պնդելով, թե ողջ ազգի հարստությունը քահանաների մոտ է<sup>117</sup>: Քյուրուկի տղա Համիդը սաստիկ ծեծի է ենթարկել հայտնի հնչակյան գործիչ Տյույուկյան Նազարեթին՝ նրանից պահանջելով կազմակերպության գանձերը<sup>118</sup>:

Հանձնումներից հետո հայտնի են դեպքեր, երբ վերադարձվել են մի քանի մանրադրամներ՝ առաջիկա մի քանի օրերին ծախսելու համար<sup>119</sup>:

Տաղավարներում հանձնման գործողությունն ավարտելուց հետո հանձնախմբի անդամները մտել են քարավանների մեջ և տակնուվրա արել սայլերի բեռները, սննդի պարկերը, պատառոտել են տոպրակները, պարունակությունները լցրել գետնին, բզկտել են անկողիները, բարձերը և գտել թաքցված հարստություններ: Այդ գործողություններն ուղեկցվել են բռնություններով: Քարավաններից մեկի 80-100 կանանց առանձնացրել են խանի առջև, ամբողջությամբ մերկացրել և մանրակրկիտ խուզարկել են մարմինները և որոշ դեպքերում գտել թաքցված հարստություններ<sup>120</sup>: Քարավանի թալանն ավարտելուց հետո խուզարկել են խանում բանտարկված տղամարդկանց<sup>121</sup>:

Այսքանից հետո, ըստ Կ. Գաբրիկյանի, պաշտոնական գողերը, առգրավված իրերը լցնելով խուրջիների մեջ, վերցրել և տեղափոխել են մեկ այլ վայր<sup>122</sup>: Ամբաս-

113 Կարապետեան Էլիզա, նշվ. աշխ., էջ 1-2:

114 Լուսարարյան Սեպուհ, նշվ. աշխ., էջ 163:

115 Գաբրիկեան Կարապետ, *Եղեռնասպարում*, 1924, էջ 146:

116 Նույն տեղում, էջ 149:

117 Նույն տեղում, էջ 150: Զառացյան Հայկանույշ, նշվ. աշխ., էջ 0114:

118 Նույն տեղում, էջ 150:

119 Լուսարարյան Սեպուհ, նշվ. աշխ., էջ 162:

120 Գաբրիկեան Կարապետ, *Եղեռնասպարում*, 1924, էջ 149: Գաբրուսեան Փայլածու, նշվ. աշխ., էջ 61:

121 Ալեքսանդրեան Օհանես, նշվ. աշխ., էջ 21 շրջ: Գաբրիկեան Կարապետ, *Եղեռնասպարում*, 1924, էջ 142: *Հուշագրական ծառանգություն*, էջ 191, 212:

122 Գաբրիկեան Կարապետ, *Եղեռնասպարում*, 1924, էջ 150:

տանագրի տվյալներով յուրաքանչյուր քարավանից 6-10 հեյպե<sup>123</sup> ոսկի և այլ թանկագին գարդեր են կողոպտվել, ըստ մեկ այլ վկայության՝ 10 բակեղեթ<sup>124</sup>: Ըստ վկաներից մեկի պատմածի՝ մեկ օրվա ընթացքում հավաքվել է 22 հեկ հարստություն<sup>125</sup>: Թալանված հարստությունները տեսակավորվել և լցվել են առանձին կողովների մեջ՝ ոսկի-ոսկեղեն, արծաթ-արծաթեղեն<sup>126</sup>, մատանիներ, ապարանջաններ, ժամացույցներ, աղամանդներ, զմրուխտներ, մարգարիտներ, արծաթապատ մագաղաթներ, ոսկյա խաչեր և տարվել Սեբաստիա<sup>127</sup>: Այդտեղ տարվելու տեղեկությունը հաստատվել է նաև օսմանյան փաստաթղթերով և ըստ դրանցից մեկի՝ գանձերը Խալիս և Համիդ բեկերի կողմից տարվել են Խալիլ բեկի տուն<sup>128</sup>՝ ժանդարմների հրամանատար, աշխատանքային ջոկատների կոտորածի պատասխանատուներից<sup>129</sup>:

Կողոպուտը շարունակվել է նույնիսկ կայանից դուրս գալուց հետո: Հայտնի է դեպք, երբ քարավանները ճանապարհելուց հետո հասել են նրանց հետևից և պատճառաբանելով բանակի հացի մատակարարման անհրաժեշտությամբ՝ առգրավել են սայլեր<sup>130</sup>:

Կայանում տեղ գտած թալանի նախավերջին արարը տեղի է ունեցել հետևյալ կերպ: Նույն երեկոյան քարավանին ուղեկցող ժանդարմները՝ տեսնելով, թե ինչ քանակությամբ հարստություն թալանվեց ժողովրդից, կրկին գնդակահարության սպառնալիքով տարագրյալներից մեկ անգամ ևս պահանջել են գումար: Քարավանը հարկադրված մինչև առավոտ հավաքել է գումարը և ճամփա դուրս գալուց առաջ հանձնել ժանդարմներին: Ըստ Գաբրիկյանի՝ թալանի այս փուլում նույն սխեմայով նախորդ քարավաններից 60-70 տղամարդ, հիմնականում երիտասարդներ, սպանվել են<sup>131</sup>:

Քանի որ խանը գտնվում էր Սեբաստիայի և Խարբերդի վիլայեթների սահմանագլխին, քարավաններին ուղեկցող ժանդարմներն այդտեղից պետք է փոխվեին<sup>132</sup>: Նշված հանգամանքը հաշվի առնելով՝ նրանք մի վերջին անգամ թալանել են աքսորյալներին հետևյալ կերպ. ժանդարմները հաջորդ կայան հասնելիս կանանց առաջարկել են Քյոթո խանում բանտարկված ամուսիններին ազատելու համար վճարել 5-ական ոսկի, սակայն գումարը վերցնելուց հետո էլ նրանց չեն վերադարձրել<sup>133</sup>:

123 Թերքի հեյպե – խորջինով լի:

124 Գաբրիկյան Կարապետ, *Եղեռնապատյում*, 1924, էջ 148:

125 Համբարձումյան Վահան, նշվ. աշխ., էջ 222:

126 Գաբրիկյան Կարապետ, *Եղեռնապատյում*, 1924, էջ 144, 146, 150:

127 Լուսարարյան Սեպուհ, նշվ. աշխ., էջ 163:

128 Guerguerian K., “Sivas 18” (2018). *Sivas*. 18. <https://commons.clarku.edu/sivas/18.>:

129 Գաբրիկյան Կարապետ, *Եղեռնապատյում*, 1924, էջ 591:

130 Համբարձումյան Վահան, նշվ. աշխ., էջ 222:

131 Գաբրիկյան Կարապետ, *Տեղեկագիր Սեբաստիոյ*, էջ 108:

132 Գաբրիկյան Կարապետ, *Եղեռնապատյում*, 1924, էջ 161:

133 Գաբրիկյան Կարապետ, *Եղեռնապատյում*, մաս Դ, 33, «Երիտասարդ Հայաստան», 1920, թիվ 97, ապրիլ 7:

## Զուգահեռներ

Քյոթո խանում տեղ գտած կողոպուտի այս սխեմային զուգահեռներ կարելի է գտնել Սեբաստիայի և հարակից վիլայեթների տեղահանության պատմության մեջ: Դրանց թվում էր Ջիլե գյուղի դեպքը, երբ կազմվել է ատյան-հանձնաժողով, որն արձանագրել է քսորականների անուն-ազգանունները և թանկարժեք իրերն առգրավել՝ պատճառաբանելով ճանապարհին անվտանգության երաշխիքների բացակայությամբ, և խոստացել նույնությամբ հանձնել տարագրյալներին, երբ նրանք վերադառնան<sup>134</sup>:

Մեզ հանդիպած ամենամոտ նմանությունը դեպքերին արձանագրված է Թոնուս քաղաքից ոչ հեռու գտնվող վայրում՝ Սամսոնի տարագրյալ քարավաններից մեկում: Աղբյուրը հայտնել է, որ քաղաքացիական հագուստներով մի խումբ մարդիկ, իրենց ներկայանալով որպես պետական պաշտոնյաներ, կանգնեցրել են քարավանը և նստելով մի սեղանի շուրջ՝ նույն մոտեցմամբ հրամայել հանձնել թանկարժեք իրերը, որոնք արձանագրել են անուն-ազգանուններով, և կրկին նույն՝ Մալաթիա հասնելուն պես ամբողջությամբ վերադարձնելու խոստումով թալանել են քարավանը<sup>135</sup>: Այստեղ նույնպես կատարվել է երեխաների և կանանց մարմինների մանրակրկիտ խուզարկություն<sup>136</sup>:

Նմանօրինակ պատկեր կարելի է տեսնել Տիվրիկ քաղաքի քարավանների ճանապարհին: Տիվրիկի շրջակայքում մի մունետիկ բարձրացել է տանիքի վրա և հայերեն բղավելով՝ զգուշացրել, որ իրենց վաղվա ճանապարհը վտանգավոր է, և մեծ քանակությամբ քրդեր են հարձակվելու և թալանելու քարավանը, իսկ ուղեկցող ժանդարմները չեն կարողանալու ապահովել անվտանգությունը: Ուստի վերը նկարագրված դեպքերի նմանությամբ այստեղ նույնպես հրամայվել է հանձնել թանկարժեք իրերը, որոնք Արաբկիր հասնելուն պես պետք է նույնությամբ վերադարձվեին, իսկ չհանձնելու պարագայում պետք է մարմինների վրա խուզարկություն իրականացվեր՝ ընդհուպ մինչև ինտիմ հասվածներ<sup>137</sup>:

## Մերի Գրեֆեմի հանգամանքը

Սեբաստիայի տեղահանությունը նկարագրող վկայությունների մեջ հանդիպում է առաջին հայացքից տարօրինակ և վերը նկարագրված փաստերի հետ չհամադրվող մի հուշագրություն: Էտսքը կաթոլիկ հոգևորական հայր Հակոբ Վրդ. Քոսյանի՝ Գանտիտա Գույումջյանից գրառած վերապրումի պատմության մասին է: Ըստ հուշագրության, երբ քարավանը, որի մեջ էր քույր Գանտիտա Գույումջյանը, մոտեցել է խանին, իրեն անհասկանալի պատճառով քարավանը 15 րոպե հեռավորության վրա կանգնեցրել են դաշտի մեջ՝ գիշերելու<sup>138</sup>: Երբ քարավանի անդամները պատրաստվել

134 Մեսրոպ Լեոն, *Աղէլու եւ վերածնունդ*, Փարիզ, տպագր. «Արարս», 1952, էջ 399-400:

135 Հէքիմեան Օթոն, *Սամսոնի հայրթեան պիտոր բաժինը 1915-1918-ի Մեծ Եղեռնէն*, Փարիզ, ա.հ., 1961, էջ 113:

136 Նույն տեղում, էջ 114:

137 Զարդարեան Երուանդ, նշվ. աշխ., էջ 130:

138 Քօսեան Յակոբ, նշվ. աշխ., էջ 392:

են սայլերը կանգնեցնել և իջնել, Քյոթու խանի բարյացակամ մի չերքեզ՝ մյուդիրը, տեսնելով ոչ հեռու տարածքի վրա գտնվող քարավանը, մարդ է ուղարկել և քարավանի կառապաններին ստիպել սայլերը տանել մինչև խան՝ դրա դիմաց գիշերելու: Մյուդիրը ճանաչում էր քարավանի որոշ անդամների և սկսել է նրանց կարիքները հոգալ. հրահանգել է բերել ուտելիք՝ մածոն, պանիր: Քարավանում եղած փախստականներին թև թևի կապած առաջնորդել են խանի խցերից մեկը: Հետաքրքրական են այս ընթացքում տեղ գտած գողության դեպքը և դրա լուծումը: Քարավանին ուղեկցող ժանդարմները գողացել են տարագրյալների կապոցներից մեկը, ինչի մասին իմանալուց հետո մյուդիրն այն վերադարձնում է տերերին և ձեռքակալելով գողություն կատարած ժանդարմներին՝ ուղարկում Մալաթիա: Դրանից հետո արգելել է քարավանին շարունակել ճամփան<sup>139</sup>: Վերապրողը նշված դեպքը բացատրում է չձեռքակալված ժանդարմներից վտանգի տակ լինելու հանգամանքով:

Գողոնը վերադարձնելուց հետո, ի նշան երախտագիտության, գողության հանգամանքը վեր հանած խումբն այն նվիրել է մյուդիրին: Վերը նկարագրված իրադարձությունների հետ այս դրվագը նույնիսկ որևէ հեռավոր առնչություն չունի, սակայն այս արտասովոր գործելաճի պատճառը բացահայտվում է վկայության հաջորդող տողերում: Թալանի դրվագից մի քանի ժամ անց կայանին է մոտեցել Սեբաստիայի տարագրյալների մեծ քարավան՝ շուրջ 1.500 սայլերով: Այս մեծ խմբում էր նաև ամերիկացի միսիոներուհի Մերի Գրեֆենը: Նա 1902 թվականից տնօրինել է Սեբաստիայի աղջկանց վարժարանը<sup>140</sup>: Դոկտոր Քլարքի հետ 1914 թ. օգնել է Կարինի բնակիչներին պայքարելու տիֆի դեմ<sup>141</sup>, վերադառնալով Սեբաստիա՝ Մերի Գրեֆենը դոկտոր Քլարքի հետ փորձել է պահպանել հայերի հարստությունը, դրանք իր մոտ է թաքցրել՝ վերադարձնելու նպատակով<sup>142</sup>: Տեսնելով դպրոցի ուսուցիչների և աշակերտների բռնազաղթը՝ դիմել է կուսակալ Մուամներին և ստացել նրանց ուղեկցելու և խնամելու թույլտվություն<sup>143</sup>: Մերի Գրեֆենը շրջում էր բազմահազարանոց քարավանի միջով և փորձում էր հոգալ արտոյալների կարիքները<sup>144</sup>: Գրեֆենի՝ որպես օտար վկայի ներկայությունը զսպում է ռճրագործների գործողությունները: Նրա ներկայությամբ փորձ է կատարվում հնարավորինս քաղաքակիրթ տեսք տալու բռնի տարագրությանը: Մերի Գրեֆենը, գիտակցելով նշված հանգամանքը, հենց այդ նպատակով էր ուղեկցում քարավաններին<sup>145</sup>: Կաշկանդվածությունից ազատվելու համար մի քանի կայաններ անցնելուց հետո Մալաթիայում թուրք պաշտոնյաները հարկադրել են նրան

139 Գաբրիելեան Կարապետ, *Եղեռնապատում*, 1924, էջ 394:

140 Քասունի Երուանդ, *Քննական ակնարկ «Միշրների հերոլդ»-ի 1815-1918 թթ. հայ ժողովուրդի ցեղասպանության և վերածնունդի մասին արձանագրած վկայագրություններուն*, Պէյրուֆ, «Մ.Ա.Հ.Ա.Ե. միութեան հրատարակչական գրասենեակ», 2012, էջ 208:

141 Նույն տեղում, էջ 208-209:

142 Նույն տեղում, էջ 100:

143 Նույն տեղում, էջ 209:

144 Նույն տեղում, էջ 398:

145 Partridge George, <http://vhaonline.usc.edu/viewingPage?testimonyID=56557&returnIndex=0#> վեցերորդ թույլ:

վերադառնալ Սերաստիա: Գրեֆենը, մնալով Սերաստիայում, շարունակել է իր մարդասիրական գործունեությունը՝ հետցեղասպանական փուլում իր գործուն մասնակցությունը բերելով որբահավաքման և որբերի կրթական գործին<sup>146</sup>: Այս և այլ ձևերով մինչև իր կյանքի վերջը նա իր նպաստն է բերել հայությանը<sup>147</sup>:

### Վերջաբան

Քյոթու խանի իրադարձությունների քննությունը հանգեցնում է մի շարք եզրակացությունների:

1. Ապահովագրական հանձնախմբի անվան տակ ծալված հանցավոր խումբը կազմված էր պետական համակարգի ներկայացուցիչներից՝ կուսակցականներ, *Թեշքիշաթ-ը մահսուսե*-ի անդամներ, բանտերից հատուկ նպատակով տարբեր ժամանակահատվածներում բաց թողնված հանցագործներ, տեղական ինքնակառավարման օղակներում գտնվող կամ դրանց առնչակից անձինք: Նրանց ներգրավվածությունը ցույց է տալիս թալանի և կոտորածի՝ պետության կողմից ուղիղ կազմակերպված լինելը:

2. Տղամարդիկ, որոնց ցեղասպանության նախնական փուլերում հաջողվել էր խուսափել զորակոչից (աշխատանքային ջոկատներում սպանվելուց), հետագա բռնություններից և հասնել տարագրության փուլին, այս փուլում արդեն սեռական տարանջատման սկզբունքով դառնում էին քաղաքականության զոհ՝ խմբերին պաշտպանվելու հնարավորությունից զրկելու, առաջին հերթին՝ տղամարդկանց թիրախավորելու և ոչնչացնելու ծրագրով:

3. Կայանում տեղ գտած իրադարձությունների համակարգվածությունը, գործելատճի կրկնողությունը և ծավալները, խմբի կողմից ներկայացվող փաստաթղթերի գոյությունը փաստում են, որ հանցագործությունները եղել են նախօրոք ծրագրված և համակարգված: Իսկ հարող շրջաններում հայտնաբերված զուգահեռներն ապացուցում են, որ կայանի դեպքերը չեն եղել իրենց տեսակի մեջ եզակի և կրկին հիմք են տալիս եզրակացնելու, որ այդ կոտորածները մաս կամ փուլ են կազմել ավելի մեծ ծրագրի:

4. Ցեղասպանության այս դրվագը «տեղահանությունը հավասար է կոտորածի» բանաձևի իսկությունն ապացուցող օրինակ է, որը վառ կերպով արտացոլում է տեղահանության իրական պատկերը և կառավարության կողմից ձեռնարկված միջոցների (ուղեկցող ժանդարմների նշանակում, «Ապահովագրական հանձնախումբ») իրական գործառույթները:

5. Մերի Գրեֆենի օրինակով կարելի է տեսնել օտար ականատեսի գործուն ոչ միայն որպես վկայող, այլև որպես զսպող գործոն, կոտորածները կանխարգելող հանգամանք, ինչը նաև գիտակցվում էր հենց ականատեսի կողմից:

146 Պատրիկ Առաքել, *Պատմագիրք յուշամարեան Սերաստիոյ և գաւառի հայութեան*, հատոր Ա, տպ. «Մշակ», 1974, էջ 563-564:

147 Նույն տեղում, էջ 565:



**KÖTÜ HAN.  
A STATION ON THE DEPORTATION ROUTE OF SEBASTIA**

*Robert Sukiasyan*

**SUMMARY**

The article presents the massacres and robberies which took place in the summer of 1915 in Kötü Han; one of the stations on deportation route of Sebastia province. The study is based on the compilation of testimonies of eyewitness survivors from the Armenian archives, print media, memoir books, collections of testimonies, the documents emerging from the turkish courts-martial of 1919–1920, as well as on the studies on the topic. The material discussed in the article shows that the violence, massacre and robbery committed by the “Insurance Commission” were planned, systematic and coordinated by the authorities. Particular attention is paid to the relationships between the foreign witnesses, victim and perpetrator groups and their interactions.

*Key words:* Armenian Genocide, Sebastia, Kötü Han, insurance commission, Emniyet Komisioni, deportation, massacre, looting, province, six vilayets, foreign witnesses.

**КОТУ-ХАН.  
ОБ ОДНОЙ СТАНЦИИ НА ПУТИ ДЕПОРТАЦИИ В ПРОВИНЦИИ СЕБАСТИЯ**

*Роберт Сукиасян*

**РЕЗЮМЕ**

В статье представлены события в Коту-хане, где при депортации армян провинции Себастья в 1915 году произошли массовые убийства и грабежи. Исследование основано на свидетельствах выживших очевидцев, которые сохранились в армянских архивах, были опубликованы в СМИ, в отдельных книгах и сборниках свидетельства выживших, в документах о судебных разбирательствах над младотурками, а также в других исследованиях по этой теме. Всесторонне рассмотренный материал показывает, что насилие, массовые убийства и грабежи, совершенные группой «Страховая комиссия», координировались властями и по своей природе не являлись беспрецедентными. Особое внимание уделяется отношениям и взаимодействию между связанными с событиями на станции иностранными свидетелями, жертвами и преступными группами.

*Ключевые слова:* Геноцид армян, Себастья, Коту-хан, депортация, убийство, мародерство, страховая комиссия, провинция, шесть вилайетов, иностранные свидетели.